

Mid-Day Dogri News Bulletin, 30th April 2024

समे – 12:25

<><><><><><>

PM Rally

प्रधानमंत्री नरेन्द्र मोदी होरें अज्ज महाराष्ट्र दे मादा च इक जन सभा गी संबोधत कीता। उनें आक्खेआ जे केन्द्र सरकार नै 25 करोड़ लोकें गी गरीबी थमां बाहर कड्डेआ। उनें एह बी आक्खेआ जे सरकार शिड़क, रेल ते हवाई अड्डें दे बुनियादी ढांचे गी विकसित करने उप्पर कम्म करा'रदी ऐ।

<><><><><><>

PM Ramban

प्रधानमंत्री नरेन्द्र मोदी होरें जम्मू कश्मीर दे रामबन च होए दे हादसे उप्पर बसोस प्रगट कीता ऐ। उनें मृतक परोआर कन्नै संवदेना प्रगट कीती ते जख्मी होए दे लोकें दी तौले नरोआ होने दी प्रार्थना कीती ऐ। पीएमएनआरएफ थमां 2 लक्ख रपे हर मृतक दे नेडमे रिश्तेदार गी ते 50 जहार रपे जख्मी लोकें गी दित्ते जांगन।

<><><><><><>

Kishtwar Rains

पिछले चऊं दिनें थमां किश्तवाड़ च होआ करदी भारी बरखा गी दिक्खदे होई जिला प्रशासन नै आपातकालीन स्थिति च कम्म करने लेई अमल गी हाई अलर्ट पर रौहने लेई आक्खेआ ऐ। मुत्तलका तैहसीलदारें जानकारी दित्ती ऐ जे इस कारण किश्तवाड़ नागसेनी ते मुगल मैदान तैहसीलें च तकरीबन कोई 12 घरें गी नुक्सान पुज्जा ऐ। नागसेनी तैहसील च इक कच्चा घर पूरी चाल्ली तबाह होई गेआ जिसलै कि मुगलमैदान तैहसील च 7 पक्के घर ते 2 कच्चे घरें गी नुक्सान पुज्जा ऐ। इआं गै किश्तवाड़ तैहसील च इक पक्के घर ते डंगरें गी रखने आले शौड गी मता नुक्सान पुज्जा ऐ जिसलै के इक कच्चा घर ते इक प्राइवेट स्कूलै दी इमारते गी थहोई नुक्सान होआ ऐ। जिला प्रशासन नै डिस्ट्रिक मैजिस्ट्रेट डॉ. देवांश यादव हुंदी निगरानी च सब्बने प्रभावत परोआरें गी सुरक्षत थाहरें पर पजाई दित्ता ऐ ते रैड क्रास दी टीम प्रभावत परोआरें गी राहत समेयान ते जरूरी मदाद देने लेई तनेदही कन्नै कम्म करा'रदी ऐ।

आपदा आली इस स्थिति च लोकें गी सौहगा कीता गेआ ऐ जे ओह ऐसी थाहरें पर नेई जान जित्थें नुक्सान होने दी शेंका ऐ। आपदा दी स्थिति च लोक कंट्रोल रूम च राबता करी सकदे न। लोक राबते लेई 01995-259555 जां फही 9484217492 पर कॉल करी सकदे न। एहदे अलावा पुलस कंट्रोल रूम च 9906154100 जां 01995-259193 ते 100 डॉयल करी राबता कीता जाई सकदा ऐ।

<><><><><><>

Amit Shah

केन्द्री गृहमंत्री अमित शाह होरें असम दे गोवाहाटी च इक प्रेस कांफ्रेंस च आक्खेआ जे कांग्रेस एह गलत अफवाह फैला करदी ऐ जे बीजेपी 400 सीटां पार करने मगरा आरक्षण खत्म करी देग। उनें आक्खेआ जे एह गल्लां बेबुनियाद ते तथ्यहीन न। उनें एह बी आक्खेआ जे में एह गल्ल साफ करना चाहनां जे बीजेपी एससी, एसटी ते ओबीसी ते म्हेशां रक्षक दे तौरा उप्पर अपनी भूमका नभाग।

<><><><><><>

Chief of Nawal Staff

वाईस चीफ ऑफ नावल स्टाफ वाईस एडमिरल दिनेश के.त्रिपाठी होरें अज्ज नौसेना दे नमें चीफ दा औहदा संभालेआ। उनें आक्खेआ जे ओह आत्मनिर्भर भारत बनने च भारतीय नौसेना दे जज्बे गी होर मजबूत करगंन। अपने 40 ब'रें दे मते लम्मे करियर च त्रिपाठी होरें पच्छमी नौसेना दी कमान सनें केई महत्वपूर्ण कम्म कीते न।

<><><><><><>

Article 370 SC

सुप्रीम कोर्ट 2019 च केन्द्र सरकार आस्सेआ जम्मू कश्मीर गी दित्ता गेदा विशेष दर्जा हटाने आली दफा 370 गी हटाने दी वैद्वता बारे सुनवाई लेई तैआर ऐ। अदालतै इस मामले दी सुनवाई पैहली मई गी करना तैह कीते दा ऐ। अदालत नै इस मामले गी पिछले ब'रे सुनवाई लेई रखेआ हा।

अदालत नै चुनां आयोग गी जम्मू कश्मीर च इस ब'रे सितम्बर म्हीने तगर विधानसभा चुनां करोआने दियां बी हिदायतां दित्ती दियां न।

<><><><><><><>

Shri Amarnath Yatra

जम्मू दे डिवीजनल कमीशनर रमेश कुमार ते एडीजीपी जम्मू जोन आनंद जैन होरें श्री अमरनाथ जी दी यात्रा दी तैआरिएं दे सरबंधै च इक उच्ची सतह दी बैठक लाई। बैठक च आईजीपी ट्रैफिक, डीआईजी सीआरपीएफ, सैलसफा निदेशक जम्मू सांबा, कटुआ, उधमपुर ते रामबन दे डिप्टी कमीशनरें हिस्सा लैता। डिवीजनल कमीशनर होरें भगवती नगर, चिचि माता मंदर, रेलवे स्टेशन जम्मू, उधमपुर ते जम्मू हवाई अड्डें ते होरने थाहरें पर पंजीकरण ते आरएफआईडी काउंटर कायम करने दियां हिदायतां दित्तियां। इस दरान यात्रिएं दी सुविधा लेई लंगर, पानी सप्लाई, सेहत दिक्खभाल सरबंधी सुविधा ते होरने इंतजामें पर बी चर्चा होई। जम्मू नगर निगम गी हिदायत कीती गई जे ओह कचरे दे प्रबंधन गी जकीनी बनान। राष्ट्रीय जरनैली शिड़क पर यातायात दे प्रबंधन गी सुचारू बनाने लेई बी निर्देश जारी कीते गे।

<><><><><><><>

Jammu Illegal Mining

जम्मू जिले दे ग्रां च अपने दौरे दरान जम्मू कश्मीर पुलस नै अवैध खनन आस्तै 3 गड्डियां जब्त कीतियां। जम्मू दे डिस्ट्रिक्ट मैजिस्ट्रेट होरें इक सोशल मीडिया पोस्ट राएं दस्सेआ ऐ जे जिला जम्मू दे ग्रामीण क्षेत्र च बक्ख-बक्ख थाहरें पर चानचक्क दौरा लाया गेआ ते इनें गड्डिएं गी जब्त कीता गेआ।

<><><><><><><>

DC Doda

डोडा दे डिप्टी कमीशनर होरें खराब मौसम दे चलदे इक सोशल मीडिया पोस्ट राएं आक्खेआ जे जेहड़े लोक चनां दरेया कोल जां बक्ख-बक्ख नालें दे कोल रौहदे न, ओह खराब मौसम दे चलदे अपने घरै थमां नेई निकलन ते कुसै बी चाल्ली दी मदाद लेई ओ ईओसी डीसी दफ्तर डोडा दे उप्पर संपर्क करी सकदे न। नंबर ऐ 99063-20997।

<><><><><><>

UGC

इस ब'रे होने आले यूजीसी-एनईटी दे मतेयान दी तरीक गी अगड़ा पाई दित्ता गेआ ऐ। हुन एह मतेयान 16 जून दे बजाय 18 जून गी लैते जांगन। यूजीसी नै एह फैसला परीक्षाथिएं थमां फीगबैक दी पच्छोकड़े दा लैता ऐ। यूजीसी नै आक्खेआ ऐ जे एह मतेयान पूरे मुल्खै च इक्कै ध्याड़े ओएमआर मोड च लैता जाग। यूजीसी-एनईटी दी परीक्षा भारतीय यूनीवर्सिटीएं ते कालजें च असिसटेंट प्रोफेसर ते जूनियर रिसर्च फ़ैलोशिप लेई लैती जंदी ऐ।

<><><><><><>

LS With Drawn Srinagar

लोकसभा चुनां 2024 च श्रीनगर लोकसभा सीट लेई मेदवारी वापस लैने दे खीरी ध्याड़े 5 मेदवारें रिटर्निंग अफसर दे दफ्तर जाइयै अपनी मेदवारी वापस लेई लैती। कुल 29 मेदवारें शा हुन 24 मेदवार गै श्रीनगर लोकसभा सीट लेई चुनां लड़गंन।

<><><><><><>